

განმარტებითი ბარათი

საქართველოს კანონის პროექტზე

„ვაზისა და ღვინის შესახებ“ საქართველოს კანონში ცვლილების შეტანის თაობაზე“

ა) ზოგადი ინფორმაცია კანონპროექტის შესახებ:

ა.ა) კანონპროექტის მიღების მიზეზი:

ა.ა.ა) პრობლემა, რომლის გადაჭრასაც მიზნად ისახავს კანონპროექტი:

კანონპროექტის მიღების მიზეზია ის გარემოება, რომ ქვეყნის ეკონომიკის პრიორიტეტულ დარგებს შორის მეღვინეობა, დღეს უკვე სახელმწიფოს მიერ ერთმნიშვნელოვნადაა გამოკვეთილი, შესაბამისად, კონკურენტუნარიანი ყურძნისეული წარმოშობის ალკოჰოლიანი სასმლის წარმოებისა და რეალიზაციისათვის აუცილებელია ადგილობრივი და საერთაშორისო ბაზრების მოთხოვნათა გათვალისწინება, შესაბამისი საკანონმდებლო აქტების შემუშავება და მოქმედის ცვლილება.

კანონპროექტი მიზნად ისახავს, „ვაზისა და ღვინის შესახებ“ საქართველოს კანონში ცვლილებების ინიცირებას, ინიციატივა გამომდინარეობს ღვინის მწარმოებელი კომპანიებისა და როგორც ადგილობრივი, ასევე საერთაშორისო ბაზრის მოთხოვნიდან, რომ არსებული პროდუქტი, რომლის დამზადებისათვის ბაზად გამოყენებულია ღვინო და დეალკოჰოლიზაციის გზით მიღებული ღვინო დაექვემდებაროს სამართლებრივ რეგულირებას. ზემოაღნიშნული ცვლილება ხელს შეუწყობს საქართველოში ღვინისა და სხვა ყურძნისეული წარმოშობის ალკოჰოლიანი სასმელების კონკურენტუნარიანი ბაზრის გაფართოებასა და განვითარებას, მაღალხარისხიანი ღვინისა და ყურძნისეული წარმოშობის სხვა ალკოჰოლიანი სასმელების წარმოებასა და რეალიზაციას ადგილობრივ სამომხმარებლო ბაზარზე, ქართული მევენახეობა-მეღვინეობის საერთაშორისო ავტორიტეტის შენარჩუნებასა და ზრდას, საქართველოში მევენახეობა-მეღვინეობის, როგორც ქვეყნის ისტორიულად, კულტურულად და ეკონომიკურად პრიორიტეტული დარგის განვითარებას.

„ვაზისა და ღვინის შესახებ“ საქართველოს კანონში ღვინისეული სასმელი და ამავე კანონში არსებული ღვინის კატეგორიებისათვის, ახალი კატეგორიის დამატება - როგორცაა „დეალკოჰოლიზებული ღვინო“ თავისი მახასიათებლებით განსხვავდება კანონით განსაზღვრული კატეგორიებისაგან და ბაზარზე, მათი არსებობა საჭიროს ხდის მათი წარმოებისა და რეალიზაციის წესების საკანონმდებლო რეგულირებას, ასევე, საქართველოში წარმოებული და საქართველოში სარეალიზაციოდ განკუთვნილი ალკოჰოლიანი სასმელის სავალდებულო სერტიფიცირება, ყურძნისეული წარმოშობის სპირტიან სასმელთან ერთად ყურძნისეული წარმოშობის სპირტის წარმოების ზოგადი წესისა და ნებადართული პროცესების, მასალებისა და ნივთიერებების წარმოების სამართლებრივად დარეგულირება საჭიროებს რიგ საკანონმდებლო ცვლილებებს.

ა.ა.ბ) არსებული პრობლემის გადასაჭრელად კანონის მიღების აუცილებლობა:

ქვეყნის ეკონომიკისათვის ერთ-ერთი მნიშვნელოვანი საკითხია საქართველოში მევენახეობა-მეღვინეობის დარგის განვითარება, ადგილობრივი სამომხმარებლო ბაზრის მაღალი ხარისხის ყურძნისეული წარმოშობის ალკოჰოლიანი სასმლით უზრუნველყოფა. ყურძნისეული წარმოშობის ალკოჰოლიანი სასმლის ადგილობრივ ბაზარზე რეალიზაციასთან ერთად მნიშვნელოვანია მათი ექსპორტი და იმპორტიორი ქვეყნის მოთხოვნებთან შესაბამისობა. ასევე მნიშვნელოვანია, კონკურენტუნარიანი გარემოს შექმნა და ღვინის მწარმოებელი კომპანიებისათვის ქართული ღვინისა და ყურძნისეული წარმოშობის სხვა ალკოჰოლიანი სასმელების ექსპორტისათვის ხელსაყრელი პირობების არსებობა, ქართული ღვინის ცნობადობისა და მისი ექსპორტის მაჩვენებლის ზრდა. სწორედ, ზემოაღნიშნული მიზნების განხორციელებასა და არსებული ახალი გამოწვევების დაძლევის ემსახურება „ვაზისა და ღვინის შესახებ“ საქართველოს კანონში ცვლილების განხორციელება და დღეისათვის დაურეგულირებელი პროდუქტისათვის შესაბამისი სამართლებრივი ნორმების დაწესება და არსებულის ცვლილება. ამასთან, ევროკავშირის „სპირტიანი სასმელის გეოგრაფიული აღნიშვნის დასახელების განმარტების, აღწერილობის, წარდგენისა და ეტიკეტირების შესახებ“ 2008 წლის N110 რეგლამენტის შესაბამისად ბრენდისათვის მინიმალური სპირტშემცველობა 36%-ია, რომელიც მნიშვნელოვანია გათვალისწინებულ იქნეს „ვაზისა და ღვინის შესახებ“ საქართველოს კანონში, რაც ხელს შეუწყობს ევროკავშირის წევრ ქვეყნებში სპირტიანი სასმელის ექსპორტის ზრდას.

ა.ბ) კანონპროექტის მოსალოდნელი შედეგები:

კანონპროექტის მოსალოდნელი შედეგია ქვეყნის ეკონომიკის პრიორიტეტული დარგის განვითარების ხელშეწყობა. ყურძნისეული წარმოშობის ალკოჰოლიანი სასმლის მწარმოებელ კომპანიებს შესაძლებლობა მიეცემათ აწარმოონ დარგისათვის ახალი ღვინისეული სასმელი (ღვინის ბაზაზე დამზადებული ალკოჰოლიანი სასმელი), რაც თავის მხრივ დადებითად აისახება მეღვინეობის განვითარებასა და ექსპორტის მაჩვენებელზე, ვინაიდან აღნიშნულ პროდუქტზე მაღალი მოთხოვნაა რიგ იმპორტიორ ქვეყნებში. ზემოაღნიშნული კი ხელს შეუწყობს წარმოების პროდუქტიულობის გაზრდას, კონკურენტუნარიანი ბაზრის განვითარებას და გაზრდის ალკოჰოლიანი სასმელის ექსპორტის მაჩვენებელს. სავალდებულო გახდება და დარეგულირდება საქართველოში წარმოებული და საქართველოში სარეალიზაციოდ განკუთვნილი ალკოჰოლიანი სასმელის სერტიფიცირება, რაც ხელს შეუწყობს ალკოჰოლიანი სასმელის მაქსიმალურ კონტროლსა და სამომხმარებლო ბაზრის ფალსიფიცირებისგან დაცვას. ასევე ყურძნისეული წარმოშობის სპირტიანი სასმელთან ერთად სამართლებრივად დარეგულირდება ყურძნისეული წარმოშობის სპირტის წარმოების ზოგადი წესი და ნებადართული პროცესები, მასალებისა და ნივთიერებების წარმოება, რაც წინაპირობაა იმისა, რომ მთავრობის დადგენილებით დარეგულირდეს „ყურძნისეული წარმოშობის სპირტიანი სასმელის, ასევე, სპირტის წარმოების ზოგადი წესისა და ნებადართული პროცესების, მასალებისა და ნივთიერებების ჩამონათვალი, ყურძნისეული წარმოშობის სპირტის კატეგორიები და ზოგადი მოთხოვნები ყურძნისეული წარმოშობის სპირტის კატეგორიების მიმართ.

ა.გ) კანონპროექტის ძირითადი არსი:

უნდა აღინიშნოს, რომ ამ დრომდე „ვაზისა და ღვინის შესახებ“ საქართველოს კანონის რეგულირების სფეროს არ წარმოადგენს ღვინისეული სასმელი-ღვინის ბაზაზე დამზადებული ალკოჰოლიანი სასმელი და დეალკოჰოლიზებული ღვინო, მაშინ როცა ადგილობრივ ბაზარზე არსებობს მოთხოვნა ზემოაღნიშნულ სასმელებზე, შესაბამისად, პროექტით ცვლილება შევიდა მე-2 მუხლის პირველ პუნქტში და კანონის მე-3 მუხლში - ტერმინთა განმარტებაში, სადაც დამატებულ იქნება შემდეგი ტერმინები: „დეალკოჰოლიზაცია“, „დეალკოჰოლიზებული ღვინო“, „ღვინისეული სასმელი“, ასევე ამავე მუხლის „ნ“, „331“ და „336“ პუნქტებში განხორციელდა ზემოთ ჩამოთვლილ ტერმინებთან შესაბამისობისათვის ცვლილება. მე-3 მუხლს დაემატა „351“ პუნქტი რომლითაც არა მხოლოდ განმარტებულია ღვინისეული სასმელი, არამედ დადგენილია სპირტშემცველობა და დამზადებისათვის საჭირო ღვინის მოცულობა, ამ მაჩვენებლების განსაზღვრისას გამოყენებულ იქნა ვაზისა და ღვინის საერთაშორისო ორგანიზაციის (OIV) „ენოლოგიური პრაქტიკის საერთაშორისო კოდექსი“.

წარმოდგენილი პროექტით, ადგილობრივ სამომხმარებლო ბაზარზე ჩამოსასხმელი სახით ღვინის, ასევე, ღვინისეული სასმელის ადგილობრივ სამომხმარებლო ბაზარზე რეალიზაციის განმახორციელებელი პირი ვალდებულია იქონიოს ალკოჰოლიანი, ასევე ღვინისეული სასმელის შესაბამისობის სერტიფიკატი, რომელსაც გასცემს სსიპ-ღვინის ეროვნული სააგენტო, რაც იქნება პროდუქტის მაღალი ხარისხის კონტროლის გარანტი და რითაც დადასტურდება, რომ იდენტიფიცირებული პროდუქცია შეესაბამება საქართველოს კანონმდებლობით დადგენილი წესით მის მიმართ განსაზღვრულ მოთხოვნებს. აღნიშნული საკითხის ამგვარი დარეგულირებით, ტერმინთა განმარტებიდან ამოღებულ იქნა 342 პუნქტი (ტერმინი - „შესაბამისობის დეკლარაცია“).

იმის გათვალისწინებით, რომ საჯარო სამართლის იურიდიული პირის – ღვინის ეროვნული სააგენტოს უფლებამოსილი პირები განიხილავენ საქართველოს ადმინისტრაციულ სამართალდარღვევათა კოდექსის 105² და 179⁵ მუხლებით გათვალისწინებულ ადმინისტრაციულ სამართალდარღვევათა საქმეებს და აქვთ ადმინისტრაციული სახდელების დადების უფლება, 3² მუხლის მე-2 პუნქტს დაემატა „ი“ ქვეპუნქტი და სააგენტოს უფლებამოსილებად განისაზღვრა, „სააღსრულებო წარმოებათა შესახებ“ საქართველოს კანონის შესაბამისად, ადმინისტრაციული სამართალდარღვევის შესახებ ოქმის იძულებით აღსრულების თაობაზე სააღსრულებო ფურცლის გაცემა. სააღსრულებო ფურცლის ფორმას კი ამტკიცებს საქართველოს გარემოს დაცვისა და სოფლის მეურნეობის მინისტრი ინდივიდუალური ადმინისტრაციულ-სამართლებრივი აქტით. 3² მუხლის მე-2 პუნქტს დაემატა „კ“ ქვეპუნქტი, რომლის საფუძველზეც სსიპ ღვინის ეროვნულ სააგენტოს, კომპეტენციის ფარგლებში, საქართველოს ფინანსთა სამინისტროს საგამომიებო სამსახურისა და საჯარო სამართლის იურიდიული პირის – შემოსავლების სამსახურის მომართვის საფუძველზე საქართველოს ტერიტორიაზე ტრანზიტულად გადაადგილებულ ალკოჰოლიან სასმელსა და სპირტზე ექნება შესაძლებლობა მონაწილეობა მიიღოს ექსპერტიზის ჩატარებაში. აღნიშნული უფლებამოსილების განსაზღვრით უზრუნველყოფილი იქნება დარგის სპეციალისტების ჩართვა, რომელთაც გააჩნიათ შესაბამისი გამოცდილება და ცოდნა ლაბორატორიული კვლევისათვის საჭირო ფიზიკო-ქიმიური მაჩვენებლების განსაზღვრის კონკრეტულ პროდუქტთან მიმართებით და ასევე ნიმუშის აღების.

პროექტით მე-14 მუხლის მე-2 პუნქტს - დამატა „მ“ ქვეპუნქტი, რითიც განისაზღვრა დამზადების მეთოდის მიხედვით კიდევ ერთი სპეციალური ღვინის კატეგორია - „დეალკოპოლიზებული ღვინო, რომელიც მიიღება ხდება დეალკოპოლიზაციის გზით და რომლის სპირტშემცველობა 0,5% დან 15% მდებ, აღსანიშნავია, რომ წარმოდგენილი სპირტშემცველობის მინიმალური მაჩვენებელი - 0,5%, განისაზღვრა ვაზისა და ღვინის საერთაშორისო ორგანიზაციის (OIV) „ენოლოგიური პრაქტიკის საერთაშორისო კოდექსის“ შესაბამისად, ხოლო მაქსიმალური მაჩვენებლის დასადგენად გათვალისწინებული იქნა ღვინის მწარმოებელთა მიერ ამ პროდუქტის დამზადების პრაქტიკა, რომელთა მაღალმა ინტერესმა განაპირობა აღნიშნული ცვლილება.

პროექტით, პროდუქტის დამზადების სპეციფიკის გათვალისწინებით და ზემოხსენებული საერთაშორისო კოდექსის შესაბამისად, მე-15 მუხლს დამატა 1¹ პუნქტი და მეღვინეობის დარგში ნებადართულად განისაზღვრა ღვინისეული სასმელის წარმოებისას წყლის, საქაროზას, ბუნებრივი არომატის და ბუნებრივი საღებავი ნივთიერების დამატება. 27 -ე მუხლის მე-2 პუნქტში განხორციელდა ცვლილება და „სპირტიანი სასმელის გეოგრაფიული აღნიშვნის დასახელების განმარტების, აღწერილობის, წარდგენისა და ეტიკეტირების შესახებ“ 2008 წლის N110 რეგლამენტის შესაბამისად ბრენდის მინიმალურ სპირტშემცველობად განისაზღვრა 36%. ასევე ყურძნისეული წარმოშობის ალკოპოლიანი სასმელს დამატა ღვინისეული სასმელი, კანონის 31-ე მუხლის სათაურში და პირველ პუნქტში, ასევე 32-ე მუხლის სათაურსა და პირველ მე-2 პუნქტებში და 33-ე მუხლში განხორციელდა ტექნიკური ხასიათის ცვლილებები ტერმინებთან შესაბამისობისათვის.

პროექტით საქართველოში წარმოებული და საქართველოში სამომხმარებლო ბაზარზე სარეალიზაციოდ განკუთვნილი ალკოპოლიანი სასმელი დაექვემდებარება რა მხოლოდ სავალდებულო სერტიფიცირებას და არა შესაბამისობის დეკლარაციის წარდგენას, შესაბამისად, აღნიშნული კანონის 33² მუხლის პირველი პუნქტსა და მე-2 პუნქტის „ა“ ქვეპუნქტში, 33² მუხლის მე-3 პუნქტსა და მე-10 პუნქტებში, ასევე 33³ მუხლის მე-3 და მე-5 პუნქტებში განხორციელდა ცვლილებები. ტერმინთა განმარტებიდან ამოღებულ იქნა ტერმინი - „შესაბამისობის დეკლარაცია“, ყოველივე უზრუნველყოფს ადგილობრივ სამომხმარებლო ბაზარზე ხარისხიანი ყურძნისეული წარმოშობის ალკოპოლიანი სასმელის რეალიზაციას და ამასთან, სავალდებულო სერტიფიცირებით მაქსიმალურად შემცირდება ფალსიფიცირებული პროდუქტის რეალიზაციის რისკი, ვინაიდან სსიპ - ღვინის ეროვნულ სააგენტოს ექნება შესაძლებლობა „ვაზისა და ღვინის შესახებ“ საქართველოს კანონით განსაზღვრული უფლებამოსილების - ინსპექტირებისა და ზედამხედველობის ფარგლებში განახორციელოს სახელმწიფო კონტროლი.

პროექტით, კანონის 33³ მუხლს დამატა 2¹ და 3¹ პუნქტები, რითიც დადგინდა, რომ ღვინისეული სასმელის ადგილობრივ სამომხმარებლო ბაზარზე განთავსება დასაშვებია მხოლოდ სამომხმარებლო ტარაში დაფასოებული სახით, მსგავსად დაცული ადგილწარმოშობის დასახელების ღვინისა და ნებისმიერი კატეგორიის სპირტიანი სასმელისა. ასევე მსგავსად სხვა ყურძნისეული წარმოშობის ალკოპოლიანი სასმელებისა, ღვინისეული სასმელის ადგილობრივ სამომხმარებლო ბაზარზე რეალიზაციის განმახორციელებელი პირმა ვალდებულია იქონიოს ამ ალკოპოლიანი სასმელის შესაბამისობის სერტიფიკატი, რომლითაც დადასტურდება

პროდუქციის შესაბამისობა საქართველოს კანონმდებლობით დადგენილ მოთხოვნებთან, ხოლო აღნიშნულის გათვალისწინებით ამავე მუხლის მე-5 პუნქტში განხორციელდა ტექნიკური ხასიათის ცვლილება, 33⁴ მუხლის პირველი პუნქტით განისაზღვრა, რომ ყურძნისეული წარმოშობის ალკოჰოლიანი სასმელებისათვის არსებული სტანდარტის შესაბამისად ღვინისეული სასმელის ექსპორტიც დასაშვებია სამომხმარებლო ტარაში დაფასოებული სახით.

პროექტით ცვლილება შევიდა კანონის 33⁶ მუხლში, რომელიც ეხება კანონის ამოქმედებასთან დაკავშირებით განსახორციელებელ ღონისძიებებს ვინაიდან, არსებობს საჭიროება ყურძნისეული წარმოშობის სპირტიანი სასმელთან ერთად ყურძნისეული წარმოშობის სპირტის წარმოების ზოგადი წესისა და ნებადართული პროცესების, მასალებისა და ნივთიერებების წარმოების სამართლებრივად დარეგულირებისა და ვინაიდან, ყურძნისეული წარმოშობის სპირტიანი სასმელი იწარმოება ყურძნისეული წარმოშობის სპირტისაგან (ღვინის, ლექის, გამოწნეხილი ან გამოუწნეხავი დურდოს გამოხდით მიღებული ყურძნისეული წარმოშობის სპირტი). მიზანშეწონილია შემუშავებულ იქნას „ყურძნისეული წარმოშობის სპირტიანი სასმელის და სპირტის წარმოების ზოგადი წესისა და ნებადართული პროცესების, მასალებისა და ნივთიერებების ჩამონათვალის განსაზღვრის შესახებ“ საქართველოს მთავრობის დადგენილება და შესაბამისად კანონიდან ამოღებული იქნება კანონის 33⁶ მუხლის პირველი პუნქტის „ბ“ ქვეპუნქტი.

კანონის რეგულირების სფეროს ემატება ახალი პროდუქტი და მიზანშეწონილია შემუშავდეს ღვინისეული სასმელის წარმოების ზოგადი წესისა და ნებადართული პროცესების, მასალებისა და ნივთიერებების ჩამონათვალის განსაზღვრის შესახებ“ საქართველოს გარემოს დაცვისა და სოფლის მეურნეობის მინისტრის ბრძანება.

ა.დ) კანონპროექტის კავშირი სამთავრობო პროგრამასთან და შესაბამის სფეროში არსებულ სამოქმედო გეგმასთან, ასეთის არსებობის შემთხვევაში (საქართველოს მთავრობის მიერ ინიცირებული კანონპროექტის შემთხვევაში):

ასეთი არ არსებობს.

ა.ე) კანონპროექტის ძალაში შესვლის თარიღის შერჩევის პრინციპი, ხოლო კანონისთვის უკუძალის მინიჭების შემთხვევაში – აღნიშნულის თაობაზე შესაბამისი დასაბუთება:

გამომდინარე იქედან, რომ კანონის ამოქმედების თარიღი უკავშირდება, როგორც სსიპ-ღვინის ეროვნული სააგენტოს ვალდებულებებს კანონით განსაზღვრული დებულებების შესასრულებლად, უზრუნველყოს ადგილობრივი სამომხმარებლო ბაზარი მაღალი ხარისხის ყურძნისეული წარმოშობის ალკოჰოლიანი სასმლით და განხორციელოს მაქსიმალური დაცვა დარგის მარეგულირებელ კანონმდებლობასთან შეუსაბამო პროდუქტის წარმოებისაგან, მიზანშეწონილია ეს კანონი, გარდა ამ კანონის პირველი მუხლის მე-2 პუნქტის „ე“ ქვეპუნქტის, მე-8 პუნქტით გათვალისწინებული კანონის 32-ე მუხლის პირველი პუნქტის „თ“ ქვეპუნქტის, მე-9 პუნქტის, მე-10 პუნქტის „ბ“ ქვეპუნქტის და მე-12 პუნქტის „ა“ ქვეპუნქტისა ამოქმედდეს გამოქვეყნებისთანავე. ამ კანონის პირველი მუხლის მე-2 პუნქტის „ე“ ქვეპუნქტი, მე-9 პუნქტი და მე-10 პუნქტის „ბ“ ქვეპუნქტი ამოქმედდეს 2023 წლის 1 იანვრიდან. ამ კანონის პირველი

მუხლის მე-8 პუნქტით გათვალისწინებული კანონის 32-ე მუხლის პირველი პუნქტის „თ“ ქვეპუნქტი ამოქმედდეს 2024 წლის 2 იანვრიდან. ამ კანონის პირველი მუხლის მე-12 პუნქტის „ა“ ქვეპუნქტი ამოქმედდეს 2021 წლის 1 ოქტომბრიდან. კანონპროექტი არ ითვალისწინებს კანონისთვის უკუმაღის მინიჭებას.

ა.ვ) კანონპროექტის დაჩქარებული წესით განხილვის მიზეზები და შესაბამისი დასაბუთება (თუ ინიციატორი ითხოვს კანონპროექტის დაჩქარებული წესით განხილვას):

კანონპროექტის დაჩქარებული წესით განხილვა არ არის მოთხოვნილი.

ბ) კანონპროექტის ფინანსური გავლენის შეფასება საშუალოვადიან პერიოდში (კანონპროექტის ამოქმედების წელი და შემდგომი 3 წელი):

ბ.ა) კანონპროექტის მიღებასთან დაკავშირებით აუცილებელი ხარჯების დაფინანსების წყარო:

კანონპროექტი არ მოითხოვს დამატებითი ხარჯების გამოყოფას საქართველოს სახელმწიფო ბიუჯეტიდან. კანონპროექტით გათვალისწინებულ ყურძნისეული წარმოშობის ალკოჰოლიანი სასმელისა და სპირტის სერტიფიცირებას, ასევე სააღსრულებო ფურცლის გაცემას და ადმინისტრაციული ორგანოს მოთხოვნის შემთხვევაში ალკოჰოლიან სასმელსა და სპირტზე ექსპერტიზის ჩატარებაში მონაწილეობის მიღებას და კანონპროექტით განსაზღვრული ნორმატიული აქტის მომზადებას სააგენტო უზრუნველყოფს არსებული ადამიანური და ფინანსური რესურსისა და სახელმწიფო ბიუჯეტით სააგენტოსთვის გამოყოფილი ასიგნებების ფარგლებში.

ბ.ბ) კანონპროექტის გავლენა სახელმწიფო ან/და მუნიციპალიტეტის ბიუჯეტის საშემოსავლო ნაწილზე:

კანონპროექტის მიღება გავლენას მოახდენს საქართველოს სახელმწიფო ბიუჯეტის საშემოსავლო ნაწილზე, რადგან:

საჯარო სამართლის იურიდიული პირი - ღვინის ეროვნული სააგენტოს მიერ 2018 წელს გაიცა 3 356 (სამი ათას სამას ორმოცდათექვსმეტი) ფასიანი სერტიფიკატი, რომლის მომსახურების საფასურმა შეადგინა 795 100 (შვიდას ოთხმოცდათხუთმეტი ათას ასი) ლარი, 2019 წლის 11 (თერთმეტი) თვის მონაცემებით გაცემულ იქნა 4 436 (ოთხი ათას ოთხას ოცდათექვსმეტი) სერტიფიკატი, რომლის მომსახურების საფასურმა შეადგინა 978 500 (ცხრაას სამოცდათვრამეტი ათას ხუთასი) ლარი, ხოლო 2020 წელს გაიცა 4655 ფასიანი სერტიფიკატი, რომლის მომსახურების საფასურმა შეადგინა 1 107 650 (ერთი მილიონ ას შვიდი ათას ექვსას ორმოცდაათი) ლარი. სააგენტოს საკუთარი წლიური შემოსავალი, ბიუჯეტიდან მიღებული დაფინანსების გარდა, 2018 წლიდან აღემატება ერთ მილიონ ლარს, კანონპროექტით გათვალისწინებული სავალდებულო სერტიფიცირებით კი გაიზრდება სააგენტოს საკუთარი შემოსავლები, რის პროპორციულადაც გაიზრდება საქართველოს სახელმწიფო ბიუჯეტში გადასახდელი გადასახადები. კონკრეტულად თუ რა გავლენას მოახდენს პროექტის მიღება სახელმწიფო ბიუჯეტის საშემოსავლო ნაწილზე, დამოკიდებული იქნება იმაზე, თუ რა რაოდენობის სერტიფიკატის გაცემა მოხდება მომავალში.

ბ.გ) კანონპროექტის გავლენა სახელმწიფო ან/და მუნიციპალიტეტის ბიუჯეტის ხარჯვით ნაწილზე:

კანონპროექტის მიღება არ არის დაკავშირებული სახელმწიფო ბიუჯეტიდან სახსრების დამატებით გამოყოფასთან.

კანონპროექტის მიღების შემთხვევაში სავალდებულო იქნება როგორც ექსპორტისათვის, ასევე, საქართველოში სამომხმარებლო ბაზარზე სარეალიზაციოდ განკუთვნილი ყურძნისეული წარმოშობის ალკოჰოლიანი სასმელისა და სპირტის სერტიფიცირება, რაც მნიშვნელოვნად ზრდის შესასრულებელ სამუშაოს, რომლის განხორციელებასაც საჯარო სამართლის იურიდიული პირი ღვინის ეროვნული სააგენტო უზრუნველყოფს ამ ეტაპზე არსებული ფინანსური და ადამიანური რესურსით. ვინაიდან სავალდებულო სერტიფიცირებას ექვემდებარება ყველა ალკოჰოლიანი სასმელი (ეს ძალაში შედის 2023 წლიდან), აღნიშნული უმნიშვნელო გავლენას მოახდენს სააგენტოსათვის სახელმწიფო ბიუჯეტით გამოყოფილ ასიგნებათა ფარგლებში ფინანსურ ხარჯვით ნაწილზე, კერძოდ გაიზრდება სერტიფიცირებასთან (სერტიფიკატს ბეჭდავს/ამზადებს სააგენტო) დაკავშირებული ხარჯები.

პროექტის შესაბამისად სააგენტოს უფლებამოსილებას ემატება სააღსრულებო ფურცლის გაცემა და ადმინისტრაციული ორგანოს მოთხოვნის შემთხვევაში ალკოჰოლიან სასმელსა და სპირტზე ექსპერტიზის ჩატარებაში მონაწილეობის მიღება. აღნიშნული არ წარმოშობს დამატებით ხარჯებს სააგენტოსთვის და სააგენტო უფლებამოსილებას განხორციელებს არსებული ადამიანური რესურსებითა და სახელმწიფო ბიუჯეტით მისთვის გამოყოფილ ასიგნებათა ფარგლებში (მევენახეობა - მეღვინეობის განვითარება პროგრამული კოდი 31 03).

პროექტით ცვლილება შევიდა კანონის 33^ე მუხლში, რომელიც ეხება კანონის ამოქმედებასთან დაკავშირებით განსახორციელებელ ღონისძიებებს. ვინაიდან, არსებობს საჭიროება ყურძნისეული წარმოშობის სპირტიან სასმელთან ერთად ყურძნისეული წარმოშობის სპირტის წარმოების ზოგადი წესისა და ნებადართული პროცესების, მასალებისა და ნივთიერებების წარმოების სამართლებრივად დარეგულირებისა და ვინაიდან, ყურძნისეული წარმოშობის სპირტიანი სასმელი იწარმოება ყურძნისეული წარმოშობის სპირტისაგან (ღვინის, ლექის, გამოწნეხილი ან გამოუწნეხავი დურდოს გამოხდით მიღებული ყურძნისეული წარმოშობის სპირტი). მიზანშეწონილია შემუშავებულ იქნას „ყურძნისეული წარმოშობის სპირტიანი სასმელის და სპირტის წარმოების ზოგადი წესისა და ნებადართული პროცესების, მასალებისა და ნივთიერებების ჩამონათვალის განსაზღვრის შესახებ“ საქართველოს მთავრობის დადგენილება. ვინაიდან, კანონის რეგულირების სფეროს ემატება ახალი პროდუქტი, მიზანშეწონილია შემუშავდეს ღვინისეული სასმელის წარმოების ზოგადი წესისა და ნებადართული პროცესების, მასალებისა და ნივთიერებების ჩამონათვალის განსაზღვრის შესახებ“ საქართველოს გარემოს დაცვისა და სოფლის მეურნეობის მინისტრის ბრძანება. აღნიშნული კანონქვემდებარე ნორმატიული აქტების მომზადებას უზრუნველყოფილი იქნება სააგენტოს ადამიანური და საჭიროების შემთხვევაში ფინანსური რესურსით.

ბ.დ) სახელმწიფოს ახალი ფინანსური ვალდებულებები, კანონპროექტის გავლენით სახელმწიფოს ან მის სისტემაში არსებული უწყების მიერ მისაღები პირდაპირი ფინანსური ვალდებულებების (საშინაო ან საგარეო ვალდებულებები) მითითებით:

კანონპროექტის მიღება სახელმწიფოს მხრიდან ახალი ფინანსური ვალდებულებების აღებას არ ითვალისწინებს.

ბ.ე) კანონპროექტის მოსალოდნელი ფინანსური შედეგები იმ პირთათვის, რომელთა მიმართაც ვრცელდება კანონპროექტის მოქმედება, იმ ფიზიკურ და იურიდიულ პირებზე გავლენის ბუნებისა და მიმართულების მითითებით, რომლებზედაც მოსალოდნელია კანონპროექტით განსაზღვრულ ქმედებებს ჰქონდეს პირდაპირი გავლენა:

კანონპროექტი გამოიწვევს ფინანსურ შედეგს იმ პირთათვის, რომელთა მიმართაც ვრცელდება კანონის მოქმედება. „საჯარო სამართლის იურიდიული პირის - ღვინის ეროვნული სააგენტოს მიერ გაწეული მომსახურების ვადისა და საფასურის დამტკიცების შესახებ“ საქართველოს მთავრობის 2011 წლის 26 იანვრის N45 დადგენილების პირველი მუხლით დამტკიცებული „საჯარო სამართლის იურიდიული პირის - ღვინის ეროვნული სააგენტოს მიერ გაწეული მომსახურების ვადისა და საფასურის“ მე-2 მუხლის შესაბამისად სერტიფიკატის გაცემა უფასოა თუ მომსახურების გაწევის ვადა 4 (ოთხი) და მეტი სამუშაო დღეა, მომსახურების გაწევის ღირებულება 3 სამუშაო დღეში შეადგენს 100 ლარს, 2 სამუშაო დღეში 200 ლარს, ხოლო 1 სამუშაო დღეში 250 ლარს.

პროექტის შესაბამისად ალკოჰოლიანი სასმელის რეალიზაციისათვის აუცილებელია შესაბამისობის სერტიფიკატის აღება. საქართველოს გარემოს დაცვისა და სოფლის მეურნეობის მინისტრის 2018 წლის 19 თებერვლის N2-82 ბრძანების N7 დანართით დამტკიცებულია შესაბამისობის დეკლარაციის ფორმა, რომელსაც ავსებს თავად ღვინის კომპანია, რომლისთვის გასაწევი ხარჯი მხოლოდ პროდუქტის ლაბორატორიული კვლევაა. შესაბამისობის დეკლარაციის შესაბამისობის სერტიფიკატის ჩანაცვლებით ღვინის კომპანიას ფინანსური ხარჯი არ გაეზრდება.

ბ.ვ) კანონპროექტით დადგენილი გადასახადის, მოსაკრებლის ან სხვა სახის გადასახდელის (ფულადი შენატანის) ოდენობა შესაბამის ბიუჯეტში და ოდენობის განსაზღვრის პრინციპი:

კანონპროექტი არ ადგენს გადასახადს, მოსაკრებელს ან სხვა სახის გადასახდელს.

ბ¹) ბავშვის უფლებრივ მდგომარეობაზე კანონპროექტის ზეგავლენის შეფასება:

კანონპროექტი ზეგავლენას არ იქონიებს ბავშვის უფლებრივ მდგომარეობაზე.

გ) კანონპროექტის მიმართება საერთაშორისო სამართლებრივ სტანდარტებთან:

გ.ა) კანონპროექტის მიმართება ევროკავშირის სამართალთან:

კანონპროექტი არ ეწინააღმდეგება ევროკავშირის სამართალს.

გ.ბ) კანონპროექტის მიმართება საერთაშორისო ორგანიზაციებში საქართველოს წევრობასთან დაკავშირებულ ვალდებულებებთან:

კანონპროექტი არ ეწინააღმდეგება საერთაშორისო ორგანიზაციებში საქართველოს წევრობასთან დაკავშირებულ ვალდებულებებს.

გ.გ) კანონპროექტის მიმართება საქართველოს ორმხრივ და მრავალმხრივ ხელშეკრულებებთან და შეთანხმებებთან, აგრეთვე, ისეთი ხელშეკრულების/შეთანხმების არსებობის შემთხვევაში, რომელსაც უკავშირდება კანონპროექტის მომზადება, - მისი შესაბამისი მუხლი ან/და ნაწილი:

კანონპროექტი არ ეწინააღმდეგება საქართველოს ორმხრივ და მრავალმხრივ ხელშეკრულებებს. აგრეთვე, კანონპროექტის მიღება არ უკავშირდება რომელიმე ხელშეკრულებას/შეთანხმებას.

გ.დ) არსებობის შემთხვევაში, ევროკავშირის ის სამართლებრივი აქტი, რომელთან დაახლოების ვალდებულებაც გამომდინარეობს „ერთი მხრივ, საქართველოსა და, მეორე მხრივ, ევროკავშირისა და ევროპის ატომური ენერჯის გაერთიანებას და მათ წევრ სახელმწიფოებს შორის ასოცირების შესახებ შეთანხმებიდან“ ან ევროკავშირთან დადებული საქართველოს სხვა ორმხრივი და მრავალმხრივი ხელშეკრულებებიდან:

ასეთი არ არსებობს.

დ) კანონპროექტის მომზადების პროცესში მიღებული კონსულტაციები:

და.ა) სახელმწიფო, არასახელმწიფო ან/და საერთაშორისო ორგანიზაცია/დაწესებულება, ექსპერტი, სამუშაო ჯგუფი, რომლმაც მონაწილეობა მიიღო კანონპროექტის შემუშავებაში:

ასეთი არ არსებობს.

და.ბ) კანონპროექტის შემუშავებაში მონაწილე ორგანიზაციის/დაწესებულების, სამუშაო ჯგუფის, ექსპერტის შეფასება კანონპროექტის მიმართ, ასეთის არსებობის შემთხვევაში:

ასეთი არ არსებობს.

და.გ) სხვა ქვეყნების გამოცდილება კანონპროექტის მსგავსი კანონების იმპლემენტაციის სფეროში, იმ გამოცდილების მიმოხილვა, რომელიც მაგალითად იქნა გამოყენებული კანონპროექტის მომზადებისას, ასეთი მიმოხილვის მომზადების შემთხვევაში:

ასეთი მიმოხილვა არ მომზადებულა.

ე) კანონპროექტის ავტორი:

საქართველოს გარემოს დაცვისა და სოფლის მეურნეობის სამინისტრო.

ვ) კანონპროექტის ინიციატორი:

საქართველოს მთავრობა.